



Vantum in Scholis inferioribus consveta docendi methodus à rectitudine deflectat, haud difficulter animadvertere poterit, quisquis exactioris iudicii staterà tùm perversam & ingeniorum indoli prorsus repugnantem ejus rationem, tùm effectus aut efficaciam, qua pollet, inanitatem perpenderit. Nam ut (imitatione Scholarum) ὕστερον καὶ ἐστέρον hinc committam, quis exiguum illum ex hac methodo fructum, quem hactenus experti sumus, non mirabitur, eumve tùm ingeniorum modernorum vivacitate, tùm expectatione publici, multò minorem non aestimabit, ubi secum reputaverit, Veteres ad Aristotelem usque claros, antecessorum suorum laboribus aliisque studiorum subsidiis, quibus hodie gaudemus, destitutos, naturæ ductu, tam brevi spatio temporis, inter operas ad vitæ sustentationem à plerisque simul exercitas, tantum Scientiarum solidis demonstrationibus acquisivisse, quantum Scholastici ceterioris ætatis, oppositâ methodò, longissimo tempore, maximoque studio, nullis districti laboribus, tot externis ad studia faciliùs tractanda subsidiis, præsertim chartis expeditioribus & arte typographicâ simul adjuti, saltem quoad terminorum explicationes, vix memoriâ complecti, nedum digno quodam invento superare, per tot secula potuerunt.

Quod perversam ejus rationem concernit, quis est, qui non videat, si methodus, quâ Veteres naturæ ductum κατὰ φύσιν seqvuti sunt, cum vulgari comparetur, Scholas horum Seculorum, ut breviter dicam, equos jungere post temonem: *Grammaticam* enim, *Rhetoricam*, *Poëticam*, *Oratoriam* & *Logicam*, ultima Veterum inventa, quæ subtili quodam artificio conceptus & verba de rebus, sed aliunde jam præcognitis, digerunt, & ultra statum simplicem, quem natura supeditat, abstractione mentis in speciosum ordinem redigunt, primò statim locò, rudibus adhuc & ab omni rerum copiâ vacuis inculcant mentibus: à *Physicæ* verò primordiis, quæ sub manibus nostris ultrò versantur, à Mineralium nempe, Plantarum & Animalium observationibus, quibus materialia Scientiæ naturalis utiliter, & jucundè se teneris insinuant mentibus, quantum consueto rigore possunt, vix tamen, retrahunt eò naturâ propensos pueros. *Mechanicæ* specimi-  
na